

摘藻堂四庫全書薈要

集部

欽定四庫全書薈要

集部

樂府詩集卷十三

四

詳校官候選知縣臣吳甸華



欽定四庫全書薈要卷一萬九千七百二十六

集部

樂府詩集卷十三

宋 郭茂倩 編

燕射歌辭

周禮大宗伯之職曰以飲食之禮親宗族
兄弟以賓射之禮親故舊朋友以饗燕之
禮親四方之賓客大行人掌大賓之禮大
客之儀以親諸侯以九儀辨諸侯之命等



諸臣之爵以同邦國之禮而待其賓客上
公饗禮九獻食禮九舉侯伯饗禮七獻食
禮七舉子男饗禮五獻食禮五舉諸侯之
卿各下其君二等大夫士皆如之凡正饗
食則在廟燕則在寢所以仁賓客也儀燕
禮曰工歌鹿鳴四牡皇皇者華笙入奏南
陔白華華黍乃間歌魚麗笙由庚歌南有
嘉魚笙崇丘歌南山有臺笙由儀遂歌鄉

樂周南關雎葛覃卷耳召南鵲巢采芣采
蘋此燕饗之有樂也大司樂曰大射王出
入奏王夏及射令奏騶虞詔諸侯以弓矢
舞樂師燕射帥射夫以弓矢舞大師大射
帥瞽而歌射節此大射之有樂也王制曰
天子食舉以樂大司樂王大食三宥皆令
奏鍾鼓漢鮑業曰古者天子食飲必順四
時五味故有食舉之樂所以順天地養神

明求福應也此食舉之有樂也隋書樂志
曰漢明帝時樂有四品其二曰雅頌樂辟
雍饗射之所用則孝經所謂移風易俗莫
善於樂禮記曰揖讓而治天下者禮樂之
謂也三曰黃門鼓吹天子宴羣臣之所用
則詩所謂坎坎鼓我蹲蹲舞我者也漢有
殿中御飯食舉七曲太樂食舉十三曲魏
有雅樂四曲皆取周詩鹿鳴晉荀勗以鹿

鳴燕嘉賓無取於朝乃除鹿鳴舊歌更作
行禮詩四篇先陳三朝朝宗之義又為王
公上壽酒食舉樂歌詩十二篇司律陳頌
以為三元肇發羣后奉璧趨步拜起莫非
行禮豈容別設一樂謂之行禮荀譏鹿鳴
之失似悟昔繆還制四篇復襲前軌亦未
為得也終宋齊已來相承用之梁陳三朝
樂有四十九等其曲有相和五引及俊雅

等七曲後魏道武初正月上日饗羣臣備
列宮縣正樂奏燕趙秦吳之音五方殊俗
之曲四時饗會亦用之隋煬帝初詔祕書
省學士定殿前樂工歌十四曲終大業之
世每舉用焉其後又因高祖七部樂乃定
以為九部唐武德初讌享承隋舊制用九
部樂貞觀中張文收造讌樂於是分為十
部後更分讌樂為立坐二部天寶已後讌

樂西涼龜茲部著錄者二百餘曲而清樂
天竺諸部不在焉

晉四廂樂歌

傅玄

晉書樂志曰晉初食舉亦用鹿鳴至武帝
泰始五年使傅玄荀勗張華各造正旦行
禮及王公上壽酒食舉樂歌詩後又詔成
公綏亦作焉傅玄造三篇一曰天鑒正旦
大會行禮歌二曰於赫上壽酒歌三曰天

命食舉東西廂歌

正旦大會行禮歌

天鑒有晉世祚聖皇時齊七政朝此萬方鍾鼓斯震九
賓備禮正位在朝穆穆濟濟煌煌三辰實麗于天君后
是象威儀孔虔率禮無愆莫匪邁德儀刑聖皇萬邦惟
則

天鑒四章章四句

上壽酒歌

於赫明明聖德龍興三朝獻酒萬壽是膺敷佑四方如
日之升自天降祚元吉有徵

於赫一章八句

食舉東西廂歌

天命大晉載育羣生於穆上德隨時化成自祖配命皇
皇后辟繼天創業宣文之績丕顯宣文先知稼穡克恭
克儉足教足食既教食之弘濟艱難上帝是祐下民所
安天祐聖皇萬邦來賀雖安勿安乾乾匪暇乃正丘郊

乃定冢社廩廩作宗光宅天下惟敬朝饗爰奏食舉盡
禮供御嘉樂有序樹羽設業笙鏞以間琴瑟齊列亦有
箎塤喤喤鼓鍾鎗鎗磬管八音克諧載夷載簡既夷既
簡其大不禦風化潛興如雲如雨如雲之覆如雨之潤
聲教所暨無思不順教以化之樂以和之和而養之時
惟邕熙禮慎其儀樂節其聲於鑠皇繇既和且平

天命十三章章四句

晉四廟樂歌

荀勗

晉書樂志曰魏杜夔傳舊雅樂四曲一曰

鹿鳴二曰騶虞三曰伐檀四曰文王皆古

聲辭及太和中左延年改夔騶虞伐檀文

王三曲更自作聲節其名雖同而聲實異

唯因夔鹿鳴全不改易每正旦大會太尉

奉璧羣后行禮東廂雅樂郎作者是也後

又改三篇第一曰於赫篇詠武帝聲節與

古鹿鳴同第二曰巍巍篇詠文帝用延年

所改騶虞聲第三曰洋洋篇詠明帝用延年所改文王聲第四曰日復用鹿鳴鹿鳴之聲重用而除古伐檀古今樂錄曰漢故事上壽用四會曲魏明帝青龍二年以長笛食舉第十一古大置酒曲代四會又易古詩名曰羽觴行用為上壽曲施用最在前鹿鳴以下十二曲名食舉樂而四會之曲遂廢宋書樂志曰晉荀勗造正旦大會

行禮歌四篇一曰於皇當於赫二曰明明
當巍巍三曰邦國當洋洋四曰祖宗當鹿
鳴王公上壽酒歌一篇曰踐元辰當羽觴
行食舉樂東西廂歌十二篇一曰煌煌當
鹿鳴二曰賓之初筵當於穆三曰三后當
昭昭四曰赫矣當華華五曰烈文當朝宴
六曰猗歟當盛德七曰隆化當綏萬邦八
曰振鷺當朝朝九曰翼翼當順天十曰既

宴當陟天庭十一曰時邕當參兩儀十二

曰嘉會

正旦大會行禮歌

於皇元首羣生資始履端大享敬御繁祉肆覲羣后爰
及卿士欽順則元允也天子

於皇一章八句

明明天子臨下有赫四表宅心惠浹荒貊柔遠能邇孔
淑不逆來格祁祁邦家是若

明明一章八句

光光邦國天篤其祐丕顯哲命顧柔三祖世德作求奄
有九土思我皇度彝倫攸序

邦國一章八句

惟祖惟宗高朗緝熙對越在天駿惠在茲聿求厥成我
皇崇之式固其猶往敬用治

祖宗一章八句

王公上壽酒歌

踐元辰延顯融獻羽觴祈令終我皇壽而隆我皇茂而
嵩本枝奮百世休祚鍾聖躬

踐元辰一章八句

食舉樂東西廂歌

煌煌七曜重明交暢我有嘉賓是應是貺邦政既圖接
以大饗人之好我式遵德讓

煌煌一章八句

賓之初筵藹藹濟濟既朝乃宴以洽百禮頌以位叙或

廷或陞登儉台叟亦有兄弟胥子陪寮憲茲度楷觀頤
養正降福孔偕

賓之初筵一章十二句

昔我三后大業是維今我聖皇焜耀前暉奕世重規明
照九畿思輯用光時罔有違陟禹之跡莫不來威天被
顯祿福履是綏

三后一章十二句

赫矣太祖克廣明德廓開宇宙正世立則變化不經民

無瑕慝創業垂統兆我晉國

赫矣一章八句

烈文伯考時惟帝景夷險平亂威而不猛御衡不迷皇
塗煥炳七德咸宣其寧惟永

烈文一章八句

猗歟盛歟先皇聖文則天作孚大哉惟君慎徽五典帝
載是懃文武發揮茂建嘉勲修己濟治民用寧殷懷遠
燭幽玄教氛氲善世不伐服事參分德博化隆道冒無

垠

猗歟一章十六句

隆化洋洋帝命溥將登我晉道越惟聖皇龍飛革運臨
燾八荒叡哲欽明配蹤虞唐封建厥福駿發其祥三朝
習吉終然允臧其臧惟何總彼萬方元侯列辟四嶽蕃
王時見世享率茲有常旅揖在庭嘉客在堂宋衛既臻
陳留山陽我有賓使觀國之光貢賢納計獻璧奉璋保
祐命之申錫無疆

隆化一章二十八句

振鷺于飛鴻漸其翼京邑穆穆四方是式無競惟人王
綱允敕君子來朝言觀其極

振鷺一章八句

翼翼大君民之攸暨信理天工惠康不匱將遠不仁訓
以淳粹幽明有倫俊乂在位九族既睦庶邦順比開元
布憲四海鱗萃協時正統殊塗同致厚德載物靈心隆
貴敷奏讜言納以無諱樹之典象誨之義類上教如風

下應如卉一人有慶羣萌以遂我后宴喜令問不墜

翼翼一章二十六句

既宴既喜翕是萬邦禮儀卒度物有其容晰晰庭燎
煌煌鼓鍾笙磬詠德萬舞象功八音克諧俗易化從其和
如樂庶品時邕

既宴一章十二句

時邕斌斌六合同塵往我祖宣威靜殊鄰首定荆楚遂
平燕秦疊疊丈皇邁德流仁爰造草昧應乾順民靈瑞

告符休徵響震天地弗違以和神人既戡庸蜀吳會是
賓肅慎率職梏矢來陳韓臧進樂均協清鈞西旅獻獒
扶南效珍蠻裔重譯玄齒文身我皇撫之景命惟新

時邕一章二十六句

愔愔嘉會有聞無聲清酤既奠遵豆既馨禮充樂備簫
韶九成愷樂飲酒酣而不盈率土歡豫邦國以寧王猷
允塞萬載無傾

嘉會一章十二句

晉四廂樂歌

張華

王公上壽詩

稱元慶奉壽觴后皇延遐祚安樂撫萬方

食舉東西廂樂詩

明明在上丕顯厥繇翼翼三壽蕃后惟休羣生漸德六合承流三正元辰朝慶鱗萃華夏奉職貢八荒覲殊類
散冕充廣庭鳴玉盈朝位

濟濟朝位言觀其光儀序既以時禮文煥以彰思皇享

多祜嘉樂永無央

九賓在庭臚讚既通升瑞奠贄乃侯乃公穆穆天尊隆
禮動容履端承元吉介福御萬邦

朝享上下咸雍崇多儀繁禮容舞盛德歌九功揚芳烈
播休蹤

皇化洽洞幽明懷柔百神輯祥禎潛龍躍雕虎仁儀鳳
鳥屆游麟枯蠹榮竭泉流菌芝茂枳棘柔和氣應休徵
弦協靈符彰帝期綏宇宙萬國和昊天成命賚皇家賚

皇家

世資聖哲三后在天啓鴻烈啓鴻烈隆王基率土謳吟
欣戴于時恒文象代氣著期

泰始開元龍升在位四隩同風變寧殊類五躔來備嘉
生以遂凝庶績臻大康申繁祉脣無疆本枝百世繼緒
不忘繼緒不忘休有烈光永言配命惟晉之祥

聖明統世篤皇仁廣大配天地順動若陶鈞玄化參自
然至德通神明清風暢八極流澤閔

於皇時晉弈世齊聖惟天降嘏神祇保定弘濟區夏允
集大命有命既集光帝猷大明重曜鑒六幽聲教洋溢
惠滂流移風俗多士盈朝賢俊比屋敦世心斲彫反素
樸反素樸懷庶方干戚舞階庭疏狄悅遐荒扶南假重
譯肅慎襲衣裳雲覆雨施德洽無疆旁作穆穆仁化翔
朝元日賓王庭承宸極當盛明衍和樂竭祇誠仰嘉惠
懷德馨游淳風泳淑清協億兆同歡榮建皇極統天位
運陰陽御六氣殷羣生成性類王道浹治功成人倫序

俗化清虔明祀祇三靈崇禮樂式儀刑

慶元吉宴三朝播金石詠泠簫奏九夏舞雲韶邁德音
流英聲八紘一六合寧六合寧承聖明王澤洽道登隆
綏函夏總華戎齊德教混殊風混殊風康萬國崇夷簡
尚敦德弘王度遠遐則

正旦大會行禮詩四首

於赫皇祖迪哲齊聖經緯大業基天之命克開洪緒誕
篤天慶旁濟彝倫仰齊七政

烈烈景皇克明克聰靜封略定勲功成民立政儀刑萬
邦式固崇軌光紹前蹤

允文烈考濬哲應期參德天地比功四時大亨以正庶
績咸熙肇啓晉宇遂登皇基

明明我后玄德通神受終正位協應天人容民厚下育
物流仁躋我王道輝光日新

晉四廂樂歌

王公上壽酒歌

上壽酒樂未央大晉應天慶皇帝永無疆

正旦大會行禮歌

穆穆天子光臨萬國多士盈朝莫匪俊德流化罔極王
猷允塞嘉會置酒嘉賓充庭羽旄曜辰極鍾鼓振泰清
百辟朝三朝或或明儀形濟濟鏘鏘金振玉聲

禮樂具宴嘉賓睂壽祚聖皇景福惟日新羣后戾止有
來雍雍獻酬納贄崇此禮容豐肴萬俎旨酒千鍾嘉樂
盡宴樂福祿咸攸同

樂哉天下安寧道化行風俗清簫韶作詠九成年豐穰
世泰平至治哉樂無窮元首聰明股肱忠澍豐澤揚清
風

嘉瑞出靈應彰麒麟見鳳凰翔醴泉湧流中唐嘉禾生
穗盈箱降繁祉祚聖皇承天位統萬國受命應期授聖
德四世重光宣開洪業景克昌文欽明德彌彰肇啓晉
邦流祚無疆

泰始建元鳳凰龍興龍興伊何享祚萬乘奄有八荒化

育黎蒸圖書煥炳金石有徵德光大道熙隆被四表格
皇穹弈弈萬嗣明明顯融高朗令終保茲永祚與天比
崇

聖皇君四海順人應天期三葉合重光泰始開洪基明
曜參日月功化侔四時宇宙清且泰黎庶咸雍熙善哉
雍熙

惟天降命翼仁祐聖於穆三皇載德彌盛總齊璇璣光
統七政百揆時序化若神聖四海同風興至仁濟民育

物擬陶鈞擬陶鈞垂惠潤皇皇羣賢峨峨英雋德化宣
芬芳播來胤播來胤垂後昆清廟何穆穆皇極闢四門
皇極闢四門萬機無不綜疊疊翼翼樂不及荒飢不遑
食大禮既行樂無極

登崑崙上曾城乘飛龍升泰清冠日月佩五星揚虹蜺
建篳旌披慶雲蔭繁榮覽八極遊天庭順天地和陰陽
序四時曜三光張帝網正皇綱播仁風流惠康
邁洪化振靈威懷萬方納九夷朝閭闔宴紫微

建五旗羅鍾虞列四縣奏韶武鏗金石揚旌羽縱八佾
巴渝舞詠雅頌和律呂于胥樂樂聖主

化蕩蕩清風泄總英雄御俊傑開宇宙掃四裔光緝熙
美聖哲超百代揚休烈流景祚顯萬世

皇皇顯祖翼世佐時寧濟六合受命應期神武鷹揚大
化咸熙廓開皇衢用成帝基

光光景皇無競惟烈匡時拯俗休功蓋世宇宙既康九
域有截天命降鑒啓祚明哲

穆穆烈考克明克雋實天生德誕膺靈運肇建帝業開
國有晉載德弈世垂慶洪庥

明明聖帝龍飛在天與靈合契通德幽玄仰化青雲俯
育重淵受靈之祐於萬斯年

晉冬至初歲小會歌

張華

日月不留四氣回周節慶代序萬國同休庶尹羣后奉
壽升朝我有嘉禮式宴百僚繁肴綺錯旨酒泉淳笙鏞
和奏磬管流聲上隆其愛下盡其心宣其壅滯詠之德

音乃宣乃訓配享交泰永載仁風長撫無外

晉宴會歌

張華

亹亹我皇配天垂光留精日昃經覽無方聽朝有暇延
命衆臣冠蓋雲集罇俎星陳肴蒸多品八珍代變羽爵
無算究樂極宴歌者流聲舞者投袂動容有節絲竹並
設宣暢四體繁手趣摯懽足發和酣不忘禮好樂無荒
翼翼濟濟

晉中宮所歌

張華

先王統大業玄化漸八維儀刑乎萬邦內訓隆壺闈皇
英垂帝典大雅詠三妃執德宣隆教正位理厥機含章
體柔順帥禮蹈謙祇螽斯弘慈惠樛木逮幽徽徽音穆
清風高義邈不追遺榮參日月百世仰餘暉

晉宗親會歌

張華

族燕明禮順綴食序親親骨肉散不殊昆弟豈他人本
枝篤同慶棠棣著先民於皇聖明后天覆弘且仁降禮
崇親戚旁施協族姻式宴盡酣娛飲御備羞珍和樂既

宣洽上下同歡欣德教加四海敦睦被無垠

樂府詩集卷十三

欽定四庫全書薈要卷一萬九千七百二十七

集部

樂府詩集卷十四

宋 郭茂倩 編

燕射歌辭

宋四廂樂歌

王韶之

宋書樂志曰王韶之造四廂樂歌五篇一
曰肆夏樂歌四章客入四廂振作於鑠曲
皇帝當陽四廂振作將將曲皇帝入變服

四廂振作於鑠將將二曲又黃鍾太簇二

廂作法章九功二曲二曰大會行禮歌二

章沽洗廂作三曰王公上壽歌一章黃鍾

廂作四曰殿前登歌三章別用金石五曰

食舉歌十章黃鍾太簇二廂更作黃鍾作

晨義體至和王道開元辰禮有容五曲太

簇作五玉懷荒高皇猷緝惟永初王道純

五曲古今樂錄曰按周禮云王出入奏王

夏賓出入奏肆夏肆夏本施之於賓帝王
出入則不應奏肆夏也

肆夏樂歌

於鑠我皇體仁包元齊明日月比量乾坤陶甄百王稽
則黃軒訐謨定命辰告四蕃

將將蕃后翼翼羣僚盛服待晨明發來朝饗以八珍樂
以九韶仰祇天顏厥猷孔昭

法章既設初筵長舒濟濟列辟端委皇除飲和無盈威

儀有餘溫恭在位敬終如初

九功既歌六代惟時被德在樂宣道以詩穆矣太和品
物咸熙慶積自遠告成在茲

大會行禮歌

大哉皇宋長發其祥纂系在漢統源伊唐德之克明休
有烈光配天作極辰居四方

皇矣我后聖德通靈有命自天誕受休禎龍飛紫極造
我宋京光宅宇宙赫赫明明

王公上壽歌

獻壽爵慶聖皇靈祚窮二儀休明等三光

殿前登歌

明明大宋緝熙皇道則天垂化光定天保天保既定肆
覲萬方禮繁樂富穆穆皇皇

沔彼流水朝宗天池洋洋貢職抑抑威儀既習威儀亦
閑禮容一人有則作孚萬邦

烝哉我皇固天誕聖履端惟始對越休慶如天斯久如

日斯盛介茲景福永固駿命

食舉歌

晨義載曜萬物咸覩嘉慶三朝禮樂備舉元正肇始典
章暉明萬方畢來賀華裔充皇庭多士盈九位俯仰觀
玉聲恂恂俯仰載爛其輝鼓鍾震天區禮容塞皇闈思
樂窮休慶福履同所歸

五玉既獻三帛是薦爾公爾侯鳴玉華殿皇皇聖后降
禮南面元首納嘉禮萬邦同歡願休哉君臣嘉燕建五

旗列四縣樂有文禮無倦融皇風窮一變

體至和感陰陽德無不柔繁休祥瑞壁應嘉鍾舞靈
鳳躍潛龍景星見甘露墜木連理禾同穗玄化洽仁澤
敷極禎瑞窮靈符

懷荒裔綏齊民荷天祐靡不賓靡不賓長世弘盛昭明
有融繁嘉慶繁嘉慶熙帝載合氣咸和蒼生欣戴三靈
協瑞惟新皇代

王道四達流仁布德窮理詠乾元垂訓順帝則靈化侔

四時幽誠通玄默德澤被八紘乾寧軌萬國

皇猷緝咸熙泰禮儀煥帝庭要荒服遐外被髮襲纓冕
左袵回衿帶天覆地載流澤汪濊聲教布獲德光大

開元辰畢來王奉貢職朝后皇鳴珩佩觀典章樂王度
悅徽芳陶盛化遊太康丕昭明永克昌

惟永初德丕顯齊七政敷五典彝倫序洪化闡王澤流
太平始樹聲教明皇紀和靈祇恭明祀衍景祚膺嘉祉
禮有容樂有儀金石陳干羽施邁武獲均咸池歌南風

舞德稱文武煥頌聲興

王道純德彌淑寧八表康九服道禮讓移風俗移風俗
永克融歌盛美造成功詠徽一作猷烈邈無窮

齊四廂樂歌

宋辭

南齊書樂志曰元會大饗四廂樂齊微改
革多仍宋舊辭其臨軒樂亦奏肆夏於鑠
四章云

肆夏樂歌

於鑠我皇體仁包元齊明日月比量乾坤陶甄百王稽
則黃軒訏謨定命辰告四蕃

將將蕃后翼翼羣僚盛服待晨明發來朝饗以八珍樂
以九韶仰祇天顏厥猷孔昭

法章既設初筵長舒濟濟列辟端委皇除飲和無盈威
儀有餘溫恭在位敬終如初

九功既歌六代惟時被德在樂宣道以詩穆矣大和品
物咸熙慶積自遠告成在茲

大會行禮歌

大哉皇齊長發其祥祚隆姬夏道邁虞唐德之克明休
有烈光配天作極辰居四方

皇矣我后聖德通靈有命自天誕受休禎龍飛紫極造
我齊京光宅宇宙赫赫明明

王公上壽歌

獻壽爵慶聖皇靈祚窮二儀休明等三光

殿前登歌

明明齊國緝熙皇道則天垂化光定天保天保既定肆
覲萬方禮繁樂富穆穆皇皇

沔彼流水朝宗天池洋洋貢職抑抑威儀既習威儀亦
閑禮容一人有則作孚萬邦

烝哉我皇實靈誕聖履端惟始對越休慶如天斯崇如
日斯盛介茲景福永固洪命

食舉歌

晨義載煥萬物咸覩嘉慶三朝禮樂備舉元正肇始典

章徽明萬方來賀華夷充庭多士盈九德俯仰觀玉聲
恂恂俯仰載爛其暉鍾鼓震天區禮容塞皇闈思樂窮
休慶福履同所歸

五玉既獻三帛是薦爾公爾侯鳴玉華殿皇皇聖后降
禮南面元首納嘉禮萬邦同欽願休哉休哉君臣熙宴
建五旗列四縣樂有文禮無勸融皇風窮一變

禮至和感陰陽德無不柔繫休祥瑞徵辟應嘉鍾舞雲
鳳躍潛龍景星見甘露墜木連理禾同穗玄化洽仁澤

敷極禎瑞窮靈符

懷荒遠綏齊民荷天祐靡不賓靡不賓長世盛昭明有
融繁嘉慶繁嘉慶熙帝載含氣感和蒼生欣戴三靈協
瑞惟新皇代

王道四達流仁德窮理詠乾元垂訓從帝則靈化侔四
時幽誠通玄默德澤被八紘禮章軌萬國

皇猷緝咸熙泰禮儀煥帝庭要荒服遐外被髮襲纓冕
左袵回衿帶天覆地載澤流汪濊聲教布濩德光大

開元辰畢來王奉貢職朝后皇鳴珩佩觀典章樂王慶
悅徽芳陶盛化遊太康惟昌明永克昌

惟建元德丕顯齊七政敷五典彝倫序洪化闡王澤流
太平始樹靈祇恭明祀衍景祚膺嘉祉

禮有容樂有儀金石陳干羽施邁武濩均咸池歌南風
德永稱文明煥頌聲興

王道純德彌淑寧八表康九服導禮讓移風俗移風俗
永克融歌盛美告成功詠休烈邈無窮

梁三朝雅樂歌

俊雅三首

沈約

隋書樂志曰衆官出入奏俊雅取禮記王制云司徒選士之秀者升之學曰俊士也
二郊太廟明堂三朝同用焉

設官分職髦俊攸俟髦俊伊何貴德尚齒唐虞咸事周
寧多士區區衛國猶賴君子漢之得人帝猷乃理

開我八襲闢我九重珩珮流響纓紱有容袞衣前邁列

辟雲從義兼東序事美西雍分階等肅異列齊恭
重列北上分庭異陞百司揚職九賓相禮齊宋舅甥魯
衛兄弟思皇藹藹羣龍濟濟我有嘉賓實惟愷悌

同前三首

蕭子雲

惟王建國辨方正位於赫有梁向明而治知人則哲聰
明文思思皇多士俊乂咸事弗惟其官惟人乃備
訓迪庶工位以德序恭己而治垂旒當宁或以言揚或
以事舉春朝秋覲圭幣惟旅翼翼艷郇莪莪齊楚

客入金奏賓至縣興威儀有則是降是升百辟卿士元首是承左右秩秩終敬且矜彝倫攸序王猷以凝

肩雅

沈約

隋書樂志曰皇太子出入奏肩雅取詩君子萬年永錫祚肩也三朝用之

自昔殷代哲王迭有降及周成惟器是守上天乃眷大梁既受灼灼重明仰承元首體乾作貳命服斯九置保置師居前居後前星比耀克隆萬壽

同前

蕭子雲

天下為家大梁受命眷求一德惟烈無競儀刑哲王元
良誕慶灼灼明兩作離承聖英華外發溫文成性立師
立保左右惟政休有烈光前星比盛

寅雅

沈約

隋書樂志曰王公出入奏寅雅取尚書周
官云貳公弘化寅亮天地也三朝用之

禮莫違樂具舉延藩辟朝帝所執桓蒲列齊莒垂衮毳

紛容與升有儀降有序齊簪紱忘笑語始矜嚴終酣醕

同前

蕭子雲

車同軌行同倫來萬國相九賓延羣后朝蓋臣禮時行
樂日新擬夷則奏雅寅衮衣曜玉帛陳儀抑抑皇恂恂

介雅三首

沈約

隋書樂志曰上壽酒奏介雅取詩大雅云
君子萬年介爾景福也三朝用之

百福四象初萬壽三元始拜獻惟衮職同心協卿士北

極永無窮南山何足擬

壽隨百禮洽慶與三朝升惟皇集繁祉景福互相仍申
錫永無遺穰簡必來應

百味既含馨六飲莫能尚玉璽信湛湛金卮頗搖漾敬
舉發天和祥祉流嘉貺

同前三首

蕭子雲

明君創洪業大同登頌聲開元洽百禮來儀奏九成申
錫南山祚赫赫復明明

三朝禮樂和百福隨春酒玉樽湛而獻聰明作元后安
樂享延年無疆臣拜手

四氣新元旦萬壽初今朝趨拜齊袞玉鍾石變簫韶日
升等皇運洪基邈且遙

需雅八首

沈約

隋書樂志曰食舉奏需雅取易象曰雲上
於天需君子以飲食宴樂也三朝用之

實體平心待和味庶羞百品多為貴或鼎或鼐宣九沸

楚桂胡鹽芼芳卉加邊列俎彫且葍

五味九變兼六和令芳甘旨庶且多三危之露九期禾

圓

一作周

按方丈粲星羅皇舉斯樂同山河

九州上腴非一族玄芝碧樹壽華木終朝采之不盈掬

用

一作以

拂腥羶和九穀既甘且飫致遐福

人欲所大味為先興和盡敬咸在旃碧鱗朱尾獻嘉鮮
紅毛綠翼墜輕翾臣拜稽首萬斯年

擊鍾以俟惟大國況乃御天流至德侑食斯舉揚盛則

其禮不謬儀不忒風猷所被深且塞

膳夫奉職獻芳滋不麇不夫咸以時調甘適苦別澁溜

其德不爽受福釐於焉逸

一作悅

豫永無期

備味斯饗惟至聖咸降人神禮為盛或風或雅流歌詠
負鼎言歸啓殷命悠悠四海同茲慶

道我六穗羅八珍洪鼎自饗匪勞薪荆包海物必來陳
滑甘滷醢味和神以斯至德被無垠

同前八首

蕭子雲

農用八政食為先播時百穀民所天禘嘗郊社盡潔虔
讌饗饋食禮節宣九功惟序登頌絃

感物而動物靡遂大羹不和有遺味非極口腹而行氣
節之民心殺攸貴寧為禮本饗與餼

始諸飲食物之初設卦觀象受以需蒸民乃粒有牲芻
自衛反魯刪詩書弋不射宿殺已祛

在昔哲王觀民志庶羞百品因時備為善不同同歸治
蔬膳菲食化始至率物以躬行尊位

雅有洞酌風采蘋蒹藻之菜非八珍澗溪沼沚貴先民
明信之德感人神譬諸禴祭在西鄰

行葦之微猶勿踐寧惟血氣無身剪聖人之心微而顯
千里之應出言善况遂豚魚革前典

春酸夏苦各有宜筐筥錡釜備糗醢逡巡揖讓詔司儀
卑高制節明等差君臣之序正在斯

日月光華風四塞規饗有序儀不忒匪天私梁乃佑德
光被四表自南北長世綴旒為下國

雍雅三首

沈約

隋書樂志曰撤饌奏雍雅取禮記仲尼燕居云大饗客出以雍撤也三朝用之

明明在上其儀有序終事靡謏收鉶撤俎乃升乃降和樂備舉天德莫違人謀是與敬行禮達茲焉譙語

我餽惟阜我有孔庶嘉味既充食旨斯飫屬厭無爽冲和在御擊壤齊歡懷生等豫蒸庶乃粒宴由仁恕

百司警列皇在在陞既飫且醕卒食成禮其容穆穆其

儀濟濟凡百庶僚莫不愷悌奄有萬國抑由天啓

同前三首

蕭子雲

穆穆天子時惟聖敬濟濟羣公恭為德柄為撤有典膳
夫是命禮行禘嘗義光朝聘神饗其德民洽其慶

尚有和羹既戒且平亦有其餽亦惟克明其餽惟旅其
醕惟成百禮斯洽三省已行明哉元首通駿其聲

戒食有章卒食惟序庭鳴金奏凱收邊筥客出以雍撤
以振羽離磬乃作和鍾備舉濟濟威儀嚶嚶翼翼

北齊元會大饗歌

隋書樂志曰北齊元會大饗協律不得升
陛黃門舉麾於殿上賓入門四廂奏肆夏
皇帝出閣奏皇夏皇帝當宸羣臣奉賀奏
皇夏皇帝入宇變服黃鍾太簇二廂奏皇
夏皇帝變服移幄坐於西廂帝出升御坐
姑洗廂奏皇夏王公奠璧奏肆夏上壽黃
鍾廂奏上壽曲皇太子入至坐位酒至御

殿上奏登歌食至御前奏食舉樂文舞將
作先設階步次奏文舞武舞將作先設階
步次奏武舞皇帝入鍾鼓奏皇夏

肆夏

昊蒼眷命興王統天業高帝始道邈皇先禮成化穆樂
合風宣賓朝荒夏揚對穹玄

皇夏

夏正肇旦周物充庭具僚在位俛伏無聲大君穆穆宸

儀動睟日煦天迴萬靈胥萃

皇夏

天子南面乾覆離明三千咸列萬國填并猶從禹會如
次湯庭奉茲一德上下和平

皇夏

我應天厯四海為家協同內外混一戎華鶴蓋龍馬風
乘雲車夏章夷服其會如麻九賓有儀八音有節肅肅
於位飲和在列四序氤氲三光昭晰君矣大哉軒唐比

轍

皇夏

皇運應籙廊定區宇受終以文構業以武堯昔命舜舜
亦命禹大人馭厯重規杳矩欽明在上昭納八寅從靈
體極誕聖窮神化生羣品一作彙陶育烝人展禮肆樂協
此元春

肆夏

萬方咸暨三揖以申垂旒馮玉五瑞交陳拜稽有章升

降有節聖皇負宸虞唐比烈

上壽曲

仰三光奏萬壽人皇御六氣天地同長久

登歌

大齊統歷道化光明馬圖呈寶龜籙告靈百蠻非衆八
荒非逖同作堯人俱包禹迹

天覆地載成以四時惟皇是則比大於茲羣星拱極衆
川赴海萬宇駿奔一朝咸在

齊之以禮相趨帝庭應規蹈矩玉色金聲動之以樂和
風四布龍申鳳舞鸞歌麟步

食舉樂

三端正啓萬方觀禮具物充庭二儀合體百華照曉千
門洞晨或華或裔奉贄惟新悠悠亘六合圓首莫不臣
仰施如雨晞和猶日風化表笙鏞歌謳被琴瑟誰言文
軌異今朝混為一

彤庭爛景丹陛流光懷黃綰白鵷鷺成行文贊百揆武

鎮四方折衝鼓雷電獻替協陰陽大矣哉道邁上皇陋
五帝狹三皇窮禮物該樂章序冠帶垂衣裳

天壤和家國穆悠悠萬類咸孕育契冥化作大造靈効
珍神歸寶興雲氣飛龍蒼麟一角鳳五光朱雀降黃玉
表九尾馴三足擾化之定至矣哉瑞感德四方來

圉圉空水火菽粟求賢振滯棄珠玉衣不靡宮以卑當
陽端嘿垂拱無為云云萬有其樂不訾

嗟此舉時逢至道肖形成自持賦命無傷天行氣進皇

輿遊龍服帝阜

一作造

聖主寧區宇乾坤永相保

牧野征鳴條戰大齊家萬國拱揖應終禪
輿主廊清都大君臨赤縣高居深視當宸
正殿旦暮之期今一見

兩儀分牧以君陶有象化無垠大齊德邈
誰羣超鳳火冠龍雲露以潔風以薰榮光
至氣氤氲

神化遠人靈協寒暑調風雨變披泥檢受
圖諜圖諜啓期運昌分四序綴三光延寶
祚眇無疆

惟皇道升平日河水清海不溢雲干呂風
入律驅黔首

入仁壽與天高並地厚


刑以厝頌聲揚皇情邈眷汾襄岱山高配林壯亭亭聳
云云望旆葳蕤駕騃騃刊金闕奠玉龜

皇夏

禮終三爵樂奏九成允也天子穹壤和平載色載笑反
寢宴息一人有祉百神奉職



樂府詩集卷十四



總校官進士臣胡榮

校對官待詔臣胡士震

謄錄監生臣劉昀

欽定四庫全書薈要

集部

樂府詩集卷十五

十六

詳校官候選知縣臣吳甸華



欽定四庫全書薈要卷一萬九千七百二十八

集部

樂府詩集卷十五

宋 郭茂倩 編

燕射歌辭

周五聲調曲

庾信

曲序曰元正饗會大禮賓至食舉稱觴薦
玉六律既從八風斯暢以歌大業以舞成

功

宮調曲五首

氣離清濁剖元開天地分三才初辨正六位始成文繼
天爰立長安民乃樹君其明廣如日其澤厚如雲惟昔
我文祖撥亂拒謳歌三分未撫運八百不陵河禮敷天
下信樂正神人和風塵行息警江海欲無波

我皇承下武革命在君臨膺圖當舜玉嗣德受堯琴沈
首多推運陽城有讓心就日先知遠觀淵早見深玄精
實委御蒼正乃皆平履端朝萬國年祥一作期慶百靈玉

帛咸觀禮華戎各在庭鳳響中夷則天文正玉衡皇基
自天保萬物乃由庚

握衡平地紀觀象正天樞祺祥鍾赤縣靈瑞炳皇都更
受昭華玉還披蘭葉圖金波來白兔弱木下蒼烏玉斗
調元協金沙富國租青丘還擾圃丹穴更巢梧安樂新
咸慶長生百福符

明明九族序穆穆四門賓陰陵朝北附蟠木引東臣澗
途求板築溪源取釣綸多士歸賢戚維城屬茂親貴位

連南斗高榮據北辰迎時乃推策司職且班神日月之
所照霜露之所均永從文軌一長無外戶人

鬱盤舒棟宇崢嶸侔大壯拱木詔林衡全模徵梓匠千
櫨綺翼浮百拱長虹抗北去邯鄲道南來偃師望龍首
載文槐雲楣承武帳居者非求隘卑宮豈難尚壯麗天
下觀是以從蕭相

變宮調二首

帝遊光出震君明擅在離巖廊惟眷顧欽若尚無為龍

穴非難附鸞巢欲可窺具茨應不遠汾陽寧足隨烝民
播殖重溝洫劬勞多桑林還注雨積石遂開河明徵逢
永命平秩值年和更有薰風曲方聞晨露歌

移風廣軒厯崇德盛唐年成文興大雅出豫動鈞天黃
鍾六律正閭闔八風宣孤竹調陽管空桑節雅絃舞林
鸞更下歌山鳳欲前聞音能辨俗聽曲乃思賢感物觀
治亂治心防未然君子得其道太平何有焉

商調曲四首

君以宮唱寬大而謨明臣以商應聞義則可行有熊為
政訪道於容成殷湯受命委任於阿衡忠其敬事有罪
不逃刑誦其箴諫言之無隱情有剛有斷四方可以寧
既頌既雅天下乃升平專精一致金石為之開動有一
作其兩心妻子恩情乖苟利社稷無有不盡懷昊天降祐
元首惟康哉

百川俱會大海所以深羣材既聚故能成鄧林猛虎在
山百獸莫敢侵忠臣處國天下無異心昔我文祖執心

且危慮驅剪豺狼經營此天步今我受命又無敢逸豫
惟爾弼諧各可知兢懼

禮樂既正人神所以和玉帛有序志欲靜干戈各分符
瑞俱誓裂山河今日相樂對酒且當歌道德以喻聽撞
鐘之聲神姦不若觀鑄鼎之形艷宮既朝諸侯於是穆
岐陽或狩淮夷自此平若涉大川言憑於舟楫如和鼎
實有寄於鹽梅君臣一體可以靜氛埃得人則治何世
無奇才

風力是舉而台階序平重黎既登而天地位成功無與
讓銘太常之旌世不失職受駢毛之盟輯瑞班瑞穆穆
於堯門惟翰惟屏撫撫於周原功成而治定禮樂斯存
復子而明辟姬旦何言

角調曲二首

止戈見於絕轡之野稱伐聞於丹水之征信義俱存乃
先忘食五材並用誰能去兵雖聖人之大寶曰位實天
地之大德曰生涇渭同流清濁異能琴瑟並御雅鄭殊

聲擾擾烝人聲教不一茫茫禹跡車軌未并志在四海
而尚恭儉心包宇宙而無驕盈言而無文行之不遠義
而無立動則無成惻隱其心訓以慈惠流宥其過哀矜
典刑

匡贊之士或從漁釣雲雨之才乍歎幽谷尋芳者追深
逕之蘭識韻者探窮山之竹克明其德貢以三事樹之
風聲言于九牧協用五紀風若從時農用八政甘作其
穀殊風共軌見之周南異畝同穎聞之唐叔祈寒暑雨

是無胥怨天覆雲油滋焉滲漉幸無謝上古之淳人庶
可以封之於比屋

徵調曲六首

乾坤以含養覆載日月以貞明照臨達人以四海為務
明君以百姓為心水波瀾者源必遠樹扶疎者根必深
雲雨所施無不洽廊廟求才多所任

淳風布政常無欲至道防人能變俗求仁義急於水火
用禮讓多於菽粟屈軼無佞人可指獬豸無繁刑可觸

王道蕩蕩用無為天下四民誰不足

聖人千年始一生黃河千年始一清攝提以之而從紀
玉燭於是而文明東南可以補地缺西北可以正天傾
浮龜則東海可厲運鍾則南山可平衆仙就朝於瑤水
羣帝受享於明庭懷和則韎任並奏功烈則鍾鼎俱銘
三光以記物呈形四時以裁成正位雷風大山岳之響
寒暑通陰陽之氣武功則六合攸同文教則二儀經緯
有道則咸浴其德好生則各繁其類白日經天中則移

明月橫漢滿而虧能虧能缺既無為雖盈雖滿則不危
開信義以為苑囿立道德以為城池周監二代所損益
郁郁乎文其可知庖犧之親臨佃漁神農之躬秉耕稼
湯則救旱而憂勤禹則正冠而無暇草上之風無不偃
君子之耻知可化將欲比德於三皇未始追蹤於五霸
纖纖不絕林薄成涓涓不止江河生事之毫髮無謂輕
慮遠防微乃不傾雲官乃垂拱大君鳳厯惟欽明元首
類上帝而禋六宗望山川而朝羣后地鏡則山澤俱開

河圖則魚龍合負我之天網莫不該閭闔九闕天門開
卿相則風雲玄感匡贊則星辰下來既興周室之三聖
乃舉唐朝之八才莘臣參謀於左相大老教政於中台
其宜作則於明哲故無崇信於姦回

正陽和氣萬類繁君王道合天地尊黎人耕植於義圃
君子翱翔於禮園落其實者思其樹飲其流者懷其源
咎繇為謀不仁遠士會為政羣盜奔克寬則昆蟲內向
彰信則殊俗宅心浮橋有月支抱馬上苑有烏孫學琴

赤玉則南海輸賁白環則西山獻琛無勞鑿空於大夏
不待蹶角於蹠林

羽調曲五首

樹君所以牧人立法所以靜亂首惡既其南巢元凶於
是北竄居休氣而四塞在光華而兩旦是以雨施作解
是以風行惟渙周之文武洪基光宅天下文思千載克
聖咸熙七百在我應期實昊天有成命惟四方其訓之
運平後親之俗時亂先疎之雄踰桂林而驅象濟弱水

而承鴻既浮干呂之氣還吹入律之風錢則都內貫朽
倉則常平粟紅火中乃寒乃暑年和一風一雨聽鍾磬
念封疆聞笙竽思畜聚瑤琨篠蕩既從怪石鉛松即序
長樂善馬成廐水衡黃金為府

百川乃宗巨海衆星是仰北辰九州攸同禹跡四海合
德堯臣朝陽棲於鳴鳳靈時牧於般麟雲玉葉而五色
月金波而兩輪涼風迎時北狩小暑戒節南巡山無藏
於紫玉地不受於黃銀雖南征而北怨實西略而東賓

既永清於四海終有慶於一人

定律零陵玉管調鍾始平銅尺龍門之下孤桐泗水之
濱鳴石河靈於是讓珪山精所以奉璧滌九川而賦稅
棊三危而納錫北里之禾六穗江淮之茅三脊可以玉
檢封禪可以金繩探冊終永保於鴻名足揚光於載籍
太上之有立德其次之謂立言樹善滋於務本除惡窮
於塞源沖深其智則厚昭明其道乃尊仁義之財不匱
忠信之禮無繁動天無有不屆惟時無幽不徹作德心

逸日休作偽心勞日拙自非剛克掩義無所離於勦絕
隋元會大饗歌

隋書樂志曰元會皇帝出入殿庭奏皇夏
郊丘社廟同用皇太子出入奏肆夏食舉
奏食舉歌上壽酒奏上壽歌

皇夏

深哉皇度粹矣天儀司陞整蹕式道先馳八屯霧擁七
萃雲披退揚進揖步矩行規句陳乍轉華蓋徐移羽旗

照耀珪組陸離居高念下處安思危照臨有度紀律無虧

肆夏

惟熙帝載式固王猷體乾建本是曰孟侯馳道美漢寢
門稱周德心既廣道業惟優傳保斯道賢才與遊瑜玉
發響畫輪停輶皇基方峻乇邕恒休

食舉歌八首

燔黍設教禮之始五味相資火為紀平心和德在甘旨

牢羞既陳鍾石俟以斯而御揚盛軌

養身必敬禮食昭時和歲阜庶物饒鹽梅既濟鼎鉉調
特以膚腊加臄臠威儀濟濟懋皇朝

饗人進羞樂侑作川潛之膾雲飛臠甘酸有宜芬勺藥
金敦玉豆盛交錯御鼓既聲安以樂

玉食惟后膳必珍芳菰既絜重秬新是能安體又調神
荆包畢至海貢陳用之有節德無垠

嘉羞入饋猶化謐沃土名滋帝臺實陽華之菜雕陵栗

鼎俎芬芳豆籩溢通幽致遠車書一

道高物備食多方山膚既善水豢良桓蒲在位纂業張
加籩折俎爛成行恩風下濟道化光

禮以安國仁為政具物必陳饗牢盛且累斤斧順時令
懷生熙熙皆得性於茲宴喜流嘉慶

皇道四達禮樂成臨朝日舉表時平甘芳既飫醑以清
揚休玉卮正性情隆我帝載永明明

上壽歌

俗已乂時又良朝玉帛會衣裳基同北辰久壽共南山
長黎元鼓腹樂未央

隋宴羣臣登歌

皇明馭厯仁深海縣載擇良辰式陳高宴顓顓卿士昂
昂侯甸車旗煜爚衣纓蔥蒨樂正展縣司宮飾殿三揖
稱禮九賓為傳圓鼎臨碑方壺在面鹿鳴成曲嘉魚入
薦筐篚相輝獻酬交徧飲和飽德恩風長扇

隋皇后房內歌

儀禮曰燕歌鄉樂周南關雎葛覃卷耳召

南鵲巢采芣采蘋鄭康成云王后國君夫

人房中之樂歌也周南召南風化之本故

謂之鄉樂用之房中以及朝庭饗燕鄉射

飲酒也周官磬師掌教燕樂之鍾磬傳云

燕樂房中之樂所謂陰聲也詩傳曰國君

有房中之樂天子以周南諸侯以召南隋

書樂志曰高祖龍潛時頗好音樂嘗倚琵琶

琵琶作歌二章名曰地厚天高託言夫婦之
義牛弘修皇后房內之樂因取之為房內
曲命婦入并登歌上壽並用之煬帝大業
初柳顧言議以為房內樂者主為王后弦
歌諷誦以事君子故以房室為名其樂必
有鍾磬乃益歌鍾歌磬土革絲竹副之并
升歌下管總名房內之樂女奴肄習朝燕
用焉

至順垂典正內弘風母儀萬國訓範六宮求賢啓化進
善宣功家邦載序道業斯融

晉朝饗樂章

五代會要曰晉天福四年十二月太常奏
正至王公上壽皇帝舉酒奏玄同之樂皇
帝三飲皆奏文同之樂食舉奏昭德之舞
次奏成功之舞皇帝降坐奏大同之樂其
辭並崔忱等造唐餘錄曰天福五年十一

月冬至朝羣臣舉觴奏玄同三爵登歌奏
文同四爵登歌作羣臣飲宮懸樂作又奏
龜茲及霓裳法曲以須食畢於時衆聞龜
茲法曲雅鄭雜糅固已非之明年正旦上
壽登歌發聲悲離煩慙如虞殯薤露之音
觀者以為不祥

初舉酒文同樂

赫矣昌運明哉聖皇文興隆典禮復舊章駕鸞濟濟烏

獸蹯蹯一人有慶萬福無疆

舉酒

大明御宇至德動天君臣慶會禮樂昭宣
劔佩成列金石在縣觴觴再獻寶厯萬年

再舉酒

朝野無事寰瀛大康聖人有作盛禮重光
萬國執玉千官奉觴南山永固地久天長

四舉酒

八表歡無事三秋賀有成
照臨同日遠渥澤並雲行
河變千年色山呼萬歲聲
願修封岱禮方以稱文明

羣臣酒行歌

劍佩儼如林齊傾拱北心
渥恩頒美祿咸護聽和音
一德君臣合重瞳日月臨
歌時兼樂聖唯待贊泥金

萬國咸歸禹千官共祝堯
拜恩瞻鳳宸傾耳聽雲韶
運啓金行遠時和玉燭調
酒酣齊拊舞同賀聖明朝
令節陳高會羣臣侍御筵
玉墀留愛景金殿藹祥煙
振

鷺涵天澤靈禽下樂懸聖朝無一事何處讓堯年

周朝饗樂章

唐餘錄曰周元正冬至朝饗樂公卿入奏
忠順皇帝坐奏治順羣臣上壽奏福順皇
帝舉壽酒登歌奏康順羣臣降階公卿出
並奏忠順

忠順

歲迎更始節及朝元冕旒仰止冠劍相連八音合奏萬

物齊言常陳盛禮願永千年

忠順

明君當宇列辟奉觴雲容表瑞日影初長衣冠濟濟鍾
磬洋洋令儀克盛嘉會有章

治順

庭陳大樂坐當太微凝旒負宸端拱垂衣駕鸞成列簪
組相輝御鑪香散郁郁霏霏

福順

聖皇端拱多士輸忠蠻觴共獻臣心畢同聲齊嵩嶽祝
比華封千齡萬祀常保時雍

康順

鴻鈞廣運嘉節良辰列辟在位萬國來賓干旄屢舞金
石咸陳禮容既備帝履長春

忠順

禮成三爵樂畢九成共離金祀復列彤庭

忠順

明庭展禮為龍為光咸韶息韻鴈鷺歸行

隋大射登歌

周禮曰射人掌以射法治射儀王以騶虞九節諸侯以貍首七節大夫以采蘋士以

采蘋皆五

三一作

節射義曰騶虞者樂官備

也貍首者樂會時也采蘋者樂循法也采
蘋者樂不失職也是故天子以備官為節
諸侯以時會天子為節大夫以循法為節

士以不失職為節傳云騶虞采蘋采蘩皆樂章名狸首逸唐書樂志曰大射皇帝奏騶虞之曲皇太子奏狸首之曲會要曰王公射亦奏狸首其設懸奏樂如元會之儀按禮記載狸首詩曰曾孫侯氏四正具舉大夫君子凡以庶士小大莫處御于君所以燕以射則燕則譽蓋逸詩云

道謚金科照時又玉條明優賢饗禮洽選德射儀成鸞

旗鬱雲動寶軟儼天行巾車整三乏司表飾五正鳴球
響高殿華鐘震廣一作大庭烏號傳昔美淇衛著前名揖
讓皆時傑升降盡朝英附枝觀體定杯水覩心平豐觚
既來去燔炙復從橫欣看禮樂盛喜遇黃河清

樂府詩集卷十五

欽定四庫全書薈要卷一萬九千七百二十九

集部

樂府詩集卷十六

宋 郭茂倩 編

鼓吹曲辭

鼓吹曲一曰短簫鐃歌劉瓛定軍禮云鼓吹未知其始也漢班壹雄朔野而有之矣鳴笳以和簫聲非八音也騷人曰鳴篳吹竽是也蔡邕禮樂志曰漢樂四品其四曰

短簫鐃歌軍樂也黃帝岐伯所作以建威
揚德風敵勸士也周禮大司樂曰王師大
獻則令奏愷樂大司馬曰師有功則愷樂
獻于社鄭康成云兵樂曰愷獻功之樂也
春秋曰晉文公敗楚於城濮左傳曰振旅
愷以入司馬法曰得意則愷樂愷歌以示
喜也宋書樂志曰雍門周說孟嘗君鼓吹
于不測之淵說者云鼓自一物吹自竽籥

之屬非簫鼓合奏別為一樂之名也然則短簫鐃歌此時未名鼓吹矣應劭漢鹵簿圖唯有騎執箎箎即笳不云鼓吹而漢世有黃門鼓吹漢享宴食舉樂十三曲與魏世鼓吹長簫同長簫短簫伎錄並云絲竹合作執節者歌又建初錄云務成黃爵玄雲遠期皆騎吹曲非鼓吹曲此則列於殿庭者名鼓吹今之從行鼓吹為騎吹二曲

異也又孫權觀魏武軍作鼓吹而還此應

是今之鼓吹魏晉世又假諸將帥及牙門
曲蓋鼓吹斯則其時方謂之鼓吹矣按西
京雜記漢大駕祠甘泉汾陰備千乘萬騎
有黃門前後部鼓吹則不獨列於殿庭者
名鼓吹也漢遠如期曲辭有雅樂陳及增
壽萬年等語馬上奏樂之意則遠期又非
騎吹曲也晉中興書曰漢武帝時南越加

置交趾九真日南合浦南海鬱林蒼梧七

郡皆假鼓吹東觀漢記曰建初中班超拜

長史假鼓吹麾幢則短簫鐃歌漢時已名

鼓吹不自魏晉始也崔豹古今註曰漢樂

有黃門鼓吹天子所以宴樂羣臣也短簫

鐃歌鼓吹之一章爾亦以賜有功諸侯然

則黃門鼓吹短簫鐃歌與橫吹曲得通名

鼓吹但所用異爾漢有朱鷺等二十二曲

列於鼓吹謂之饒歌及魏受命使繆襲改其十二曲而君馬黃雉子班聖人出臨高臺遠如期石留務成玄雲黃爵釣竿十曲並仍舊名是時吳亦使韋昭改製十二曲其十曲亦因之而魏吳歌辭存者唯十二曲餘皆不傳晉武帝受禪命傅玄製二十二曲而玄雲釣竿之名不改舊漢宋齊並用漢曲又充庭十六曲梁高祖乃去其四

留其十二更制新歌合四時也北齊二十
曲皆改古名其黃爵釣竿略而不用後周
宣帝革前代鼓吹制為十五曲並述功德
受命以相代大抵多言戰陣之事隋制列
鼓吹為四部唐則又增為五部部各有曲
唯羽葆諸曲備叙功業如前代之制初魏
晉之世給鼓吹甚輕牙門督將五校悉有
鼓吹宋齊已後則甚重矣齊武帝時壽昌

殿南閣置白鷺鼓吹二曲以為宴樂陳後
主常遣宮女習北方簫鼓謂之代北酒酣
則奏之此又施於燕私矣按古今樂錄有
梁陳時宮懸圖四隅各有鼓吹樓而無建
鼓鼓吹樓者昔蕭史吹簫於秦秦人為之
築鳳臺故鼓吹陸則樓車水則樓船其在
庭則以篳篥為樓也梁又有鼓吹熊羆十
二按其樂器有龍頭大柁鼓中鼓獨揭小

鼓亦隨品秩給賜焉周武帝每元正大會
以梁桹架列於懸間與正樂合奏隋又於
桹下設熊羆貔豹騰倚承之以象百獸之
舞唐因之

漢鐃歌

古今樂錄曰漢鼓吹鐃歌十八曲字多訛
誤一曰朱鷺二曰思悲翁三曰艾如張四
曰上之回五曰擁離六曰戰城南七曰巫

山高八曰上陵九曰將進酒十曰君馬黃
十一曰芳樹十二曰有所思十三曰雉子
班十四曰聖人出十五曰上邪十六曰臨
高臺十七曰遠如期十八曰石留又有務
成玄雲黃爵釣竿亦漢曲也其辭亡或云
漢饒歌二十一無釣竿擁離亦曰翁離

朱鷺

儀禮大射儀曰建鼓在阼階西南鼓傳云

建猶樹也以木貫而載之樹之跗也隋書
樂志曰建鼓殷所作又棲翔鷺於其上不
知何代所加或曰鵠也取其聲揚而遠聞
或曰鷺鼓精也或曰皆非也詩云振振鷺
鷺于飛鼓咽咽醉言歸言古之君子悲周
道之衰頌聲之息飾鼓以鷺存其風流未
知孰是孔穎達曰楚威王時有朱鷺合沓
飛翔而來舞舊鼓吹朱鷺曲是也然則漢

曲蓋因飾鼓以鷺而名曲焉宋何承天朱
路篇曰朱路揚和鸞翠蓋曜金華但盛稱
路車之美與漢曲異矣

朱鷺魚以烏路訾邪鷺何食食茄下不之食不以吐將

以問誅

一作諫

者

思悲翁

思悲翁唐思奪我美人侵以遇悲翁也但我思蓬首

一作

叢狗逐狡兔食交君梟子五梟母六拉沓高飛暮安宿

艾如張

艾與刈同說文曰芟草也如讀為而猶春
秋曰星隕如雨也古詞曰艾而張羅又曰
雀以高飛奈雀何穀梁傳曰艾蘭以為防
置旃以為轅門謂因蒐狩以習武事也蘭
香草也言艾草以為田之大防是也若陳
蘇子卿云張機蓬艾側唐李賀云艾葉綠
花誰翦刻俱失古題本意

艾而張羅夷於何行成之四時和山出黃雀亦有羅雀以高飛奈雀何為此倚欲誰肯磔室

上之回

漢書曰孝武十四年匈奴入朝那蕭關遂至彭陽使騎兵入燒回中宮候騎至雍甘泉回中地在安定其中有宮也武帝紀曰元封四年冬十月行幸雍祠五時通回中道遂北出蕭關吳兢樂府解題曰漢武通

回中道後數出遊幸焉沈建廣題曰漢曲
皆美當時之事按石闕宮闕名近甘泉宮
相如上林賦云蹜石闕歷封巒是也

上之回所中益夏將至行將北以承甘泉宮寒暑德游
石闕望諸國月支臣匈奴服令從百官疾驅馳千秋萬
歲樂無極

翁離

擁離趾中可築室何用葺之蕙用蘭擁離趾中

戰城南

戰城南死郭北野死不葬烏可食為我謂烏且為客豪
野死諒不葬腐肉安能去子逃水深激激蒲葦冥冥梟
騎戰鬪死驚馬徘徊鳴梁築室何以南梁何北禾黍而
獲君何食願為忠臣安可得思子良臣良臣誠可思朝
行出攻暮不夜歸

巫山高

樂府解題曰古辭言江淮水深無梁可度

臨水遠望思歸而已若齊王融想像巫山
高梁范雲巫山高不極雜以陽臺神女之
事無復遠望思歸之意也又有演巫山高
不詳所起

巫山高高以大淮水深難以逝我欲東歸害梁不為我
集無高曳水何梁湯湯回回臨水遠望泣下霑衣遠道
之人心思歸謂之何

上陵

古今樂錄曰漢章帝元和中宗廟食舉
六曲加重來上陵二曲為上陵食舉後漢
書禮儀志曰正月上丁祠南郊次北郊明
堂高廟世祖廟謂之五供禮畢以次上陵
西都舊有上陵東都之儀太官上食太常
樂奏食舉按古詞大略言神仙事不知與
食舉曲同否宋何承天上陵者篇曰上陵
者相追攀但言升高望遠傷時怨歎而已

上陵何美美下津風以寒問客從何來言從水中央桂
樹為君船青絲為君竿木蘭為君櫂黃金錯其間滄海
之雀赤翅鴻白雁隨山林乍開乍合曾不知日月明醴
泉之水光澤何蔚蔚芝為車龍為馬覽遨遊四海外甘
露初二年芝生銅池中仙人下來飲延壽千萬歲

將進酒

古詞曰將進酒乘大白大略以飲酒放歌
為言宋何承天將進酒篇曰將進酒慶三

朝備繁禮薦嘉肴則言朝會進酒且以濡
首荒志為戒若梁昭明太子云洛陽輕薄
子但叙遊樂飲酒而已

將進酒乘大白辨加哉詩審博放故歌心所作同陰氣
詩悉索使禹良工觀者苦

君馬黃

君馬黃臣馬蒼二馬同逐臣馬良易之有驪蔡有赭美
人歸以南駕車馳馬美人傷我心佳人歸以北駕車馳

馬佳人安終極

芳樹

樂府解題曰古詞中有云妬人之子愁殺
人君有他心樂不可禁若齊王融相思早
春日謝朓早翫華池陰但言時暮衆芳歇
絕而已

芳樹日月君亂如於風芳樹不上無心溫而鵲三而為
行臨蘭池心中懷我悵心不可匡目不可顧妬人之子

愁殺人君有他心樂不可禁王將何似如孫如魚乎悲
矣

有所思

樂府解題曰古詞言有所思乃在大海南
何用問遺君雙珠玳瑁簪聞君有他心燒
之當風揚其灰從今已往勿復相思而與
君絕也按古今樂錄漢太樂食舉第七曲
亦用之不知與此同否若齊王融如何有

所思梁劉繪別離安可再但言離思而已
宋何承天有所思篇曰有所思思昔人曾
閔二子善養親則言生罹荼苦哀慈親之
不得見也

有所思乃在大海南何用問遺君雙珠璫
簪用玉紹繚之聞君有他心拉雜摧燒之
摧燒之當風揚其灰從今以往勿復相思
相思與君絕雞鳴狗吠兄嫂當知之
妃呼稀秋風肅肅晨風颼東方須臾高
知之

雉子班

樂府解題曰古詞云雉子高飛止黃鵠飛
之以千里雄來飛從雌視若梁簡文帝妬
場時向隴但詠雉而已宋何承天有雉子
遊原澤篇則言避世之士抗志清霄視卿
相功名猶冰炭之不相入也

雉子班如此之干雉梁無以吾翁孺雉子知得雉子高
蜚止黃鵠蜚之以重

一作千里

王可思雄來蜚從雌視子趨

一雉雉子車大駕馬

一無馬字

滕被王送行所中堯羊蜚從

王孫行

聖人出

聖人出陰陽和美人出遊九河佳人來騑離哉何駕六
飛龍四時和君之臣明護不道美人哉宜天子免甘星
筮樂甫始美人子含四海

上邪

上邪我欲與君相知長命無絕衰山無陵江水為竭冬

雷震震夏雨雪天地合乃敢與君絕

臨高臺

樂府解題曰古詞言臨高臺下見清水中有黃鵠飛翻關弓射之令我主萬年若齊謝朓千里常思歸但言臨望傷情而已宋何承天臨高臺篇曰臨高臺望天衢飄然輕舉凌太虛則言超帝鄉而會瑤臺也

臨高臺以軒下有清水清且寒江有香草目以蘭黃鵠

高飛離哉翻關弓射鵠令我主壽萬年收中吾一作吉

遠如期

一曰遠期宋書樂志有晚芝曲沈約言舊史云詁不可解疑是漢遠期曲也古今樂錄曰漢太樂食舉曲有遠期至魏省之

遠如期益如壽處天左側大樂萬歲與天無極雅樂陳佳哉紛單于自歸動如驚心虞心大佳萬人還來謁者引鄉殿陳累世未嘗聞之增壽萬年亦誠哉

石留

石留涼陽涼石水流為沙錫以微河為香向始蘇冷將
風陽北逝肯無敢與于揚心邪懷蘭志金安薄北方開
留離蘭

漢饒歌

朱鷺

王僧孺

因風弄玉水映日上金堤猶持畏羅繳未得異鳬鷺聞
君愛白雉兼因重碧雞未能聲似鳳聊變色如珪願識

昆明路乘流飲復棲

同前

裴憲伯

秋來懼寒勁歲去畏冰堅羣飛向葭下奮羽欲南遷暫
戲龍池側時往鳳樓前所歎恩光歇不得久聯翩

同前

陳後主

參差蒲未齊沈漾苦浮綠朱鷺戲蘋藻徘徊留一作流澗

曲澗曲多巖樹逶迤復斷續振振雖以明湯湯今又矚

同前

張正見

金堤有朱鷺刷羽望滄瀛周詩振雅曲漢鼓發奇聲時
將赤雁並乍逐彩鷺行別有翻潮處異色不相驚

同前

蘓子卿

玉山一朱鷺容與入王畿欲向天池飲還繞上林飛金
堤曬羽翮丹水浴毛衣非貪葭下食懷恩自遠歸

同前

張籍

翩翩兮朱鷺來汎春塘棲綠樹羽毛如翦色如染遠飛
欲下雙翅斂避人引子入深澗動處水紋開灩灩誰知

豪家網爾軀不如飲啄江海隅

艾如張

蘓子卿

誰在閒門外羅家諸少年張機蓬艾側結網槿籬邊若能飛自勉豈為繒所纏黃雀儻為誠朱絲猶可延

同前

李賀

錦襜褕繡襠襦強強飲啄哺爾雛隴東卧穠滿風雨莫

信

一作逐

龍媒隴西去齊人

一作人

織網如素空張在野春

平碧中網絲漠漠無形影誤爾觸之傷首紅艾葉綠花

誰翦刻中藏禍機不可測

上之回

簡文帝

前旆拂回中後車隅桂宮輕絲臨雲罕春色繞川風
桃林方灼灼柳路日瞳瞳笳聲駭胡騎清磬聳山戎
微臣今拜手願帝永無窮

同前

張正見

林光稱避暑回中乃吉行龍媒躡影駛玉輦御雲輕
風烏繞鵲綵鷁照昆明欲知鍾箭遠遙聽寶雞聲

同前

蕭 慤

發軔城西時回輿事北遊山寒石道凍葉下故宮秋朔
路一作落傳清警邊風卷畫旒歲餘巡省畢擁仗返皇州

同前

陳子良

承平重遊樂詔蹕上之回屬車響流水清笳轉落梅嶺
雲蓋道轉巖花映綬開下輦便高宴何如在瑤臺

同前

盧照隣

回中道路險蕭關烽候多五營屯北地萬乘出西河單

于拜玉璽天子按琱戈振旅汾川曲秋風橫大歌

同前

李白

三十六離宮樓臺與天通閣道步行月美人愁烟空恩
疎寵不及桃李傷春風淫樂意何極金輿向回中萬乘
出黃道千旗揚綵虹前軍細柳北後騎甘泉東豈問渭
川老寧邀襄野童秋暮

一作但暮

瑤池宴歸來樂未窮

同前

李賀

上之回大旗喜懸虹彗撻鳳尾劒匣破舞蛟龍蚩尤死

鼓逢逢大高慶雷齊墜地地無驚烟海千里

戰城南

吳均

躑躑青驪馬往戰城南畿五歷魚麗陣三入九重圍名
憚武安將血汗秦王衣為君意氣重無功終不歸

同前

張正見

薊北馳胡騎城南接短兵雲屯兩陣合劒聚七星明旗
交無復影角憤有餘聲戰罷披軍策還嗟李少卿

同前

盧照隣

將軍出紫塞冒頓在烏貪笳喧雁門北陣翼龍城南凋
弓夜宛轉鐵騎曉參潭應須駐白日為待戰方酣

同前

李白

去年戰桑乾源今年戰蔥河道洗兵條支海上波放馬
天山雪中草萬里長征戰三軍盡衰老匈奴以殺戮為
耕作古來唯見白骨黃沙田秦家築城備胡處漢家還
有烽火然烽火然不息征戰一作長征無已時野戰格鬪死
敗馬號鳴向天悲烏鵲啄人腸銜飛上挂枯樹枝一作上枯

枝
士卒塗草莽將軍空爾為乃知兵者是凶器聖人不
得已而用之

同前

劉 駕

城南征戰多城北無飢鷄白骨馬蹄下誰言皆有家城
前水聲苦倏忽流萬古莫爭城外地城裏有間土

同前二首

僧貫休

萬里桑乾傍茫茫古蕃壤將軍貌憔悴撫劍悲年長胡
兵尚陵逼久住亦非強邯鄲少年輩箇箇有伎倆拖槍

半夜去雪片大如掌

磧中


一作石

有陰兵戰馬時驚蹶輕猛李陵心摧殘蘇武

節黃金鎖子甲風吹色如鐵十載不封侯茫茫向誰說



樂府詩集卷十六



總校官進士臣胡榮

校對官待詔臣胡士震

謄錄監生臣劉昀